

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ
ЕРЕВАНСКИЙ ГОСУДАРСТВЕННЫЙ УНИВЕРСИТЕТ
YEREVAN STATE UNIVERSITY

ԲԱՆԲԵՐ

ԵՐԵՎԱՆԻ ՀԱՄԱԼՍԱՐԱՆԻ
ВЕСТНИК ЕРЕВАНСКОГО УНИВЕРСИТЕТА
BULLETIN OF YEREVAN UNIVERSITY

ՀԱՍԱՐԱԿԱԿԱՆ ԳԻՏՈՒԹՅՈՒՆՆԵՐ
ОБЩЕСТВЕННЫЕ НАУКИ
SOCIAL SCIENCES

ՄԻՋԱԶԳԱՅԻՆ ՀԱՐԱԲԵՐՈՒԹՅՈՒՆՆԵՐ,
ԲԱՂԱՔԱԳԻՏՈՒԹՅՈՒՆ
(Առանձնատիպ)
МЕЖДУНАРОДНЫЕ ОТНОШЕНИЯ,
ПОЛИТОЛОГИЯ
(Отдельные оттиски)
INTERNATIONAL RELATIONS,
POLITICAL SCIENCE
(Reprint)

130.6

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆԻ ՀՐԱՏԱՐԱԿՉՈՒԹՅՈՒՆ
ИЗДАТЕЛЬСТВО ЕРЕВАНСКОГО ГОСУДАРСТВЕННОГО УНИВЕРСИТЕТА
YEREVAN STATE UNIVERSITY PRESS

ԵՐԵՎԱՆ - 2010

**ՀՍԽՅ ԱՐՏԱՔԻՆ ԳՈՐԾԵՐԻ ԺՈՂՈՎՐԴԱԿԱՆ ԿՈՄԻՍԱՐԻԱՏԻ
ԿԱԶՄԱՎՈՐՄԱՆ ՊԱՏՄՈՒԹՅՈՒՆԻՑ**

ՀԱՍՈ ՍՈՒՔԻԱՍՅԱՆ

Հայաստանում խորհրդային կարգեր հաստատվելուց հետո նոր իշխանություններն անմիջապես լուծարեցին նախկին՝ դաշնակցական կառավարությունը և ձեռնամուխ եղան նոր վարչակարգի ձևավորմանը: 1920 թ. դեկտեմբերի 4-ին ժամանելով Երևան՝ Հայաստանի Սոցիալիստական խորհրդային Հանրապետության (ՀՍԽՅ) պետական իշխանության և կառավարման բարձրագույն մարմնի գործառույթները ստանձնած Հայաստանի հեղափոխական կոմիտեն (հեղկոմ) ձեռնարկեց նոր իշխանության կենտրոնական և տեղական մարմինների ձևավորումը:

Իր գոյության ընթացքում Հայաստանի առաջին Հանրապետությունը դիվանագիտական կապեր էր հաստատել տարբեր պետությունների հետ: Հայաստանի հեղկոմի առաջին իրավական ակտերից մեկը 1920 թ. դեկտեմբերի 6-ին Ս. Կասյանի ստորագրած հրամանն էր, որով 1920 թ. նոյեմբերի 29-ից դադարեցվում էին նախկին կառավարության դիվանագիտական ներկայացուցչությունների ու արտասահմանյան առաքելությունների լիազորությունները: Մինչև խորհրդային Հայաստանի ներկայացուցիչների նշանակումը, դրանց գույքի պահպանությունը դրվում էր նախկինների վրա: Սահմանվում էր, որ «խորհրդային Հանրապետություններում հայկական միսիաների լիկվիդացիան կատարվելու է խորհրդային միսիաների անմիջական հսկողությամբ»¹: Հրամանի մասին Հայհեղկոմի նախագահ Ս. Կասյանը դեկտեմբերի 7-ին հեռագրով տեղեկացրեց տարբեր պետություններում ՀՀ դիվանագիտական և հյուպատոսական ներկայացուցչություններին²: Սակայն վերջիններիս մեծ մասը չենթարկվեց ՀՍԽՅ իշխանությունների կարգադրությանը:

Ինչպես հայտնի է, Հայաստանի առաջին Հանրապետության գոյության վերջին օրերին վարչապետ Սիմոն Վրացյանը ստանձնել էր նաև արտաքին գործերի նախարարի գործառույթները: Դեկտեմբերի 2-ին՝ Ս. Վրացյանի կառավարության հրաժարականից հետո, թափուր մնաց նաև արտաքին գործերի նախարարի պաշտոնը: Ինչպես երևում է արխիվային փաստաթղթերից, նախարարության ղեկավարումը ժամանակավորապես հանձնարարվեց 1920 թ. սեպտեմբերից նախարարի օգնական (տեղակալ) Մովսես Պետրոսյանին³: Հայաստանի հեղկոմի ելից գոյությունների մատյանում 1920 թ. դեկ-

¹ «Դեկտեմբերյան սոցիալիստական մեծ ռևոլյուցիան և սովետական իշխանության հաղթանակը Հայաստանում. փաստաթղթերի և նյութերի ժողովածու», Եր., 1960, էջ 419, փաստ. № 270:

² Տե՛ս Հայաստանի ազգային արխիվ (այսուհետ՝ ՀԱԱ), ֆ. 114, ց. 2, գ. 17, թ. 6:

³ Վերջինս կուսակցական պատկանելությամբ դաշնակցական էր՝ ներկայացնում էր ՀՅԴ Բալկանների կենտրոնական կոմիտեն: 1921 թ. գարնանը Ս. Պետրոսյանը Հայաստանից անցել է Պարսկաստան: Կուսակցության վարած քաղաքական գծին համաձայն չլինելու պատճառաբանությամբ՝ 1921 թ. ամռանը հեռացել է Հ. Յ. Դաշնակցությունից (տե՛ս «Իմանջար Իրանի» (Թեհրան), 27 օգոստոսի 1921 թ., № 6):

տեմբերի 3-ի ամսաթվով կատարված թիվ 7753 գրառումն ունի հետևյալ բովանդակությունը. «Վկայականը տրուում է պ. Մովսես Պետրոսեանին առ այն, որ նա իրօք է Արտ[աքին] գործ[երի] նախ[արարութեան] կառավարչի պաշտօնում»⁴: Հայտնի է, որ Հայիեղկոմը Երևան է ժամանել միայն դեկտեմբերի 4-ին, ուստի Մ. Պետրոսյանին համապատասխան վկայականը, ամենայն հավանականությամբ, տրվել էր Դրոյի և Օ. Սիլինի կողմից:

Ժամանելով Երևան՝ Հայաստանի հեղկոմը չչտապեց արտաքին գործերի նոր ժողկոմ նշանակել. Մ. Պետրոսյանը մնաց պաշտոնակատար: Հավանաբար արդեն որոշվել էր, որ արտաքին հարաբերությունները վստահվելու էր դեռևս Խորհրդային Ադրբեջանում գտնվող Հայիեղկոմի անդամ Ալեքսանդր Բեկզադյանին:

Մ. Պետրոսյանի՝ որպես ղեկավարի ՀՍԽՅ արտգործնախարարության մեկշաբաթյա գործունեության մասին արխիվային փաստաթղթերում սուղ տեղեկություններ են պահպանվել: Մեզ հայտնի առաջին փաստաթուղթը նախկին արտգործնախարարության մի խումբ աշխատակիցներին ՀՍԽՅ զինված ուժերի հրամանատար Դրոյի, ՌՍՖՍՀ կոմիսար Օ. Սիլինի և «արտգործնախարարության գործերի վարիչ» Մ. Պետրոսյանի կողմից դեկտեմբերի 3-ին տրված վկայականներն են առ այն, որ նրանք ծառայության մեջ են «Անկախ Հայաստանի Սոցիալիստական Խորհրդային Հանրապետության» արտաքին գործերի նախարարությունում⁵:

Հայաստանի հեղկոմը կարևորում էր իր հրամանների և տարբեր որոշումների մասին ենթակա հաստատություններին տեղյակ պահելը: Այս աշխատառժը ձևավորվել էր հեղկոմի գործունեության առաջին օրերից: Դեկտեմբերի 7-ին Հայիեղկոմի դիվանապետ Համլիկ Թումանյանի ստորագրությամբ արտաքին գործերի նախարարությանն ուղղված գրությամբ տեղեկացվում էր, որ Հեղկոմի՝ դեկտեմբերի 6-ի № 4 հրամանի համաձայն՝ ՀՍԽՅ սահմաններում պետական լեզու էր ճանաչվում հայերենը, իսկ մահմեդականներով բնակեցված տարածքներում՝ հայերենին զուգահեռ նաև քուրքերենը⁶:

Դեռևս Առաջին հանրապետության շրջանից Երևանում զգացվում էր բնակմակերեսի սուր կարիք, որն իշխանությունները լուծում էին մեծ մասամբ բռնագրավումների կամ վարձակալության ճանապարհով: Մայրաքաղաք ժամանելուց հետո Հայիեղկոմը նույնպես ձեռնամուխ եղավ տարբեր կազմակերպություններին պատկանող շինությունների ու քաղաքացիներին պատկանող բնակարանների բռնագրավմանը: Դեկտեմբերի 8-ին Հայիեղկոմի նախագահ Մ. Կասյանին ուղղված գրության մեջ արտգործնախարարության վարիչ Մ. Պետրոսյանը, տեղեկացնելով, որ «Ձանազան օտար Միսսիաների շենքերում կան Մինիստրութեանս եւ մասնաւոր անձանց պատկանող իրեր», առաջարկում էր կարգադրել, որ «այդ շենքերը չը բռնագրաւեն առ այժմ՝ մինչեւ որ հնարաւորութիւն ունենանք նրանց մէջ եղած իրերը ստուգելու եւ պահպանելու համար պէտք եղած միջոցները ձեռք առնել»⁷: Դեկտեմբերի 10-ի պատասխան գրության մեջ Հայիեղկոմի ղեկավարությունը հայտնում է, որ տարբեր հիմնարկություններում

⁴ ՀՍԱ, ֆ. 1253, ց. 1, գ. 1, թ. 3:

⁵ Տե՛ս նույն տեղը, ֆ. 114, ց. 1, գ. 7, թ. 1:

⁶ Տե՛ս նույն տեղը, ց. 2, գ. 17, թ. 4 և շրջ.:

⁷ Նույն տեղում, ֆ. 113, ց. 3, գ. 4, թ. 5:

զտնվող նախարարությանը պատկանող իրերը ստուգելու և պահպանելու համար տրվում է 3 օր⁸:

Որպես արտաքին գործերի նախարարության վարիչ՝ Մ. Պետրոսյանի ստորագրությունը կրող մեզ հայտնի վերջին փաստաթուղթը (այն ունի ելից 6823 համարը) դեկտեմբերի 10-ին «Կոմունիստ» թերթի խմբագրությանն ուղղված գրություն է, որին կից ուղարկում էր նախարարությունում ստացված տարբեր անձանց անուններով նամակները: Խնդրվում էր դրանք հրատարակել «Կոմունիստի» առաջիկա համարներից մեկում⁹:

ՀՍԽՅ արտաքին գործերի նախարարության ելից փաստաթղթերը (բացի «Կոմունիստ»-ի խմբագրությանն ուղղվածից) Մ. Պետրոսյանի հետ ստորագրել է նաև կոմիսար Ս. Սողոմոնյանը: Հետագայում ՀՍԽՅ արտգործոժողկոմատի հաստիքացուցակներում կամ ելից-մտից փաստաթղթերում այս անձը կամ նման գործառույթ իրականացնող այլ պաշտոնյա այլևս չի հանդիպում: Ամենայն հավանականությամբ, ինչպես Օ. Սիլինն էր նշանակվել ժամանակավորապես պետության գերագույն իշխանությունը ստանձնած Դրոյի իշխանությանը կից կոմիսար, այնպես էլ առանց ղեկավարի մնացած արտգործնախարարությունում Ս. Սողոմոնյանն էր ժամանակավորապես կոմիսար-վերահսկիչի գործառույթներ իրականացնում:

Այսպիսով, Մովսես Պետրոսյանի՝ արտաքին գործերի նախարարության ժամանակավոր վարիչ լինելով է պայմանավորված այն հանգամանքը, որ 1920 թ. դեկտեմբերի 3-ից մինչև 10-ը ներառյալ թվագրվող մի շարք փաստաթղթեր նա է ստորագրել կամ դրանք ուղղված են նրան:

ՀՍԽՅ արտաքին գործերի ժողովրդական կոմիսարիատի ստեղծման վերաբերյալ որևէ փաստաթուղթ հայտնի չէ: Սակայն արխիվային վավերագրերի և մամուլի տվյալների համադրմամբ հնարավոր է որոշել, թե երբ է ստեղծվել ժողկոմատը, և երբ է արտգործոժողկոմ նշանակվել Ալեքսանդր Բեկզադյանը:

Խորհրդային Հայաստանի իշխանության մարմինների ստեղծման խնդրին անդրադարձած հեղինակներն արտգործոժողկոմատի ստեղծման որոշակի օր չեն նշում. պատճառը Հայիեղկոմի համապատասխան որոշման կամ հրամանի բացակայությունն է: Որոշ ուսումնասիրողներ ոչ ճիշտ եզրահանգումներ են կատարել: Այսպես, պրոֆ. Վ. Ռ. Նազարյանն իր «Սովետական Հայաստանի պետական իշխանության բարձրագույն մարմինները (1920-1922 թթ.)» աշխատության մեջ մասնավորապես գրում է. «Հայիեղկոմի համապատասխան ակտերով ստեղծվեց ՀՍՍՀ արտաքին գործերի ժողկոմատ, սահմանվեց նրա կառուցվածքը, նշանակվեց ղեկավար կազմը»¹⁰ և այնուհետև հղումկատարում արտգործոժողկոմատի ստեղծումից ամիսներ անց ժողկոմատի հաստիքների հաստատմանը վերաբերող փաստաթղթին: Այն ստորագրել է արտգործոժողկոմատի ընդհանուր բաժնի վարիչ Ալեքսանդր Մելյանը¹¹, որը ժողկոմատում աշխատանքի է անցել 1921թ. մայիսին¹²: ՀՍԽՅ առաջին արտգործոժողկոմ Ալ. Բեկզադյանի մասին կենսագրական աշխատանք հրատարակած պրոֆ. Գ. Ն. Կարապետ-

⁸ Տե՛ս նույն տեղը, թ. 6:

⁹ Տե՛ս նույն տեղը, ֆ. 114, ց. 1, գ. 12, թ. 3-5:

¹⁰ Նազարյան Վ. Ռ., Սովետական Հայաստանի պետական իշխանության բարձրագույն մարմինները (1920-1922 թթ.), Եր., 1974, էջ 97:

¹¹ Տե՛ս ՀԱԱ, ֆ. 113, ց. 3, գ. 4, թ. 141 և շրջ.: Աշխատության մեջ հղված է՝ ֆ. 40/117, ց. 3, գ. 4, թ. 141, այն դեպքում, երբ նախկին թիվ 40 ֆոնդը անվանափոխվել է միայն 113-ի:

¹² Տե՛ս նույն տեղը, ֆ. 114, ց. 1, գ. 7, թ. 134:

յանը, որը շուրջ 50 էջ է նվիրում արտաքին գործերի ժողկոմ եղած ժամանակ Ալ. Բեկզադյանի գործունեությանը, նույնիսկ մոտավոր ակնարկ չի կատարում արտգործժողկոմատի ստեղծման ու Ալ. Բեկզադյանի ժողկոմ նշանակման օրվա վերաբերյալ¹³: Իսկ պրոֆ. Ա. Ա. Եսայանը գրում է, թե «Հայաստանի սովետական սոցիալիստական Հանրապետության արտաքին գործերի ժողկոմատի ստեղծումից հետո Հայաստանի սովետական կառավարության ընդունած առաջին ակտերից մեկով վերացվեցին Հայաստանի բուրժուական հանրապետության արտասահմանյան դիվանագիտական ու հյուպատոսական ներկայացուցչությունները»¹⁴: Հեղինակի ասածից այնպես է ստացվում, թե ՀՍԽՄ արտաքին գործերի ժողկոմատի կոմիսարիատը կազմավորվել է 1920 թ. դեկտեմբերի 6-ի Հայիեղկոմի հայտնի հրամանի հրապարակումից առաջ: Ինչպես ստորև կտեսնենք, ժողկոմատը կազմավորվել է նշված հրամանի հրապարակումից օրեր անց:

Երևանի «Կոմունիստ» թերթի մի հաղորդումից տեղեկանում ենք, որ 1920 թ. դեկտեմբերի 9-ին Աղստաֆայով Երևան են ժամանել Հայաստանի հեղկոմի անդամներ Ալ. Բեկզադյանը և Ի. Դովլաթյանը¹⁵: Մեր ձեռքին է Հայիեղկոմի դեկտեմբերի 12-ի հրամանը Ալ. Բեկզադյանին «արտաքին գործոց եւ պարենաւորման ժողովրդական կոմիսար» նշանակելու մասին¹⁶: Այս պարագայում շատ տրամաբանական կարող է թվալ արտգործժողկոմատի կազմավորման օրը դեկտեմբերի 12-ը համարելը: Սակայն այդպես վարվելու համար մեզ խանգարում է առնվազն երկու հանգամանք:

Առաջինը Հայիեղկոմի դիվանապետ Համլիկ Թումանյանի ստորագրությամբ 1920 թ. դեկտեմբերի 10-ի շրջաբերականն է՝ ուղղված արտաքին գործերի կոմիսարիատին, որով պահանջվում էր հենց նույն օրը ուղարկել կոմիսարիատի աշխատակիցների ցուցակը և զբաղեցրած սենյակների թիվը¹⁷: Հաջորդը Թուրքիայի Ազգային մեծ ժողովի կառավարության արտաքին գործերի վարիչ Ահմեդ Սուլիստարին ուղղված ՀՍԽՄ դեկտեմբերի 10-ի հայտնի հայտագիրն է, որը ստորագրված է՝ «խոր[հրդային] Հայաստ[անի] արտ[աքին] գործ[երի] կոմիսար Բեկզադեան»¹⁸: Տրամաբանական է կարծել, որ դեկտեմբերի 10-ին կազմավորվել էր ՀՍԽՄ արտաքին գործերի ժողկոմատը, և Ալ. Բեկզադյանն իրականացնում էր ժողկոմի գործառույթներ: Ավելացնենք նաև, որ Հայաստանի ազգային արխիվում մեր ուսումնասիրած փաստաթղթերում «արտաքին գործերի նախարարություն» անվանում առկա է մինչև դեկտեմբերի 10-ը ներառյալ ստեղծված փաստաթղթերում: Իսկ դեկտեմբերի 13-ով թվագրվող արտգործժողկոմատի ելից փաստաթղթերից մեկն ունի 30 համարը¹⁹: Բանն այն է, որ Ս. Պետրոսյանի՝ արտգործնախարարության վարիչ աշխատած օրերին ելից և մտից փաստաթղթերը շարունակում էին ՀՀ արտգործնախարարության

¹³ Տե՛ս Կարապետյան Հ. Ն., Մեծ պայքարի մարդիկ, գիրք երկրորդ. Սարգիս Կասյան, Ալեքսանդր Բեկզադյան, Վլադիսլավ Կասաբարով, Եր., 1967, էջ 364-411:

¹⁴ Եսայան Ա. Ա., Հայաստանի միջազգային իրավական դրությունը 1920-1922 թթ., Եր., 1967, էջ 356-357:

¹⁵ Տե՛ս «Կոմունիստ» (Երևան), 11 դեկտեմբերի 1920 թ., № 6:

¹⁶ Տե՛ս ՀԱԱ, ֆ. 114, ց. 2, գ. 17, թ. 3, ֆ. 122, ց. 1, գ. 8, թ. 3:

¹⁷ Տե՛ս նույն տեղը, ֆ. 114, ց. 1, գ. 8, թ. 2:

¹⁸ Տե՛ս «Կոմունիստ» (Երևան), 14 դեկտեմբերի 1920 թ., № 8: Եսև՝ «Հոկտեմբերյան սոցիալիստական մեծ ռևոլյուցիան և սովետական իշխանության հաղթանակը Հայաստանում. փաստաթղթերի և նյութերի ժողովածու», էջ 422-424, փաստ. № 275:

¹⁹ Տե՛ս ՀԱԱ, ֆ. 114, ց. 1, գ. 13, թ. 7:

փաստաթղթերի թվահամարները: Փաստորեն, ստեղծման պահից սկսած՝ արտգործողկոմատը ակտիվ գործունեություն էր իրականացնում, քանի որ 3 օրերի ընթացքում պատրաստել էր արդեն 30 ելից փաստաթուղթ: Հետաքրքրական է, որ 1920 թ. դեկտեմբերի 28-ին սոցիալական ապահովության ժողկոմատին ուղարկված արտաքին գործերի ժողովրդական կոմիտեի աշխատակիցների հաստիքացուցակում Ալ. Բեկզադյանի կոմիտեի ստաժի սկիզբ նշված է դեկտեմբերի 2-ը՝ Հայաստանի իրական խորհրդայնացման օրը²⁰: Սա պայմանավորված է այն հանգամանքով, որ ՀՍԽՀ իշխանությունները որոշ ժամանակ Հայաստանի խորհրդայնացման օր են համարել դեկտեմբերի 2-ը: Բնորոշ է, որ 1921 թ. հոկտեմբերի 29-ին պատրաստված արտգործողկոմատի աշխատակիցների հաստիքացուցակում Առաջին Հանրապետության շրջանից ժողկոմատում աշխատող պաշտոնյաների համար որպես աշխատանքային սկզբնաժամկետ է նշված 1920 թ. դեկտեմբերի 2-ը²¹:

Փաստորեն, ՀՍԽՀ արտաքին հարաբերություններն իրականացնող վարչական կառույցը՝ արտաքին գործերի ժողկոմատը, ստեղծվել, իսկ Ալ. Բեկզադյանը ժողկոմի գործառույթներ է սկսել իրականացնել 1920 թ. դեկտեմբերի 10-ից: Միայն երկու օր անց՝ դեկտեմբերի 12-ին, Հայիեղկոմի հրամանով Ալ. Բեկզադյանը հաստատվել է ժողկոմի պաշտոնում: Այս խառնակ շրջանում նման պրակտիկան շատ տարածված էր: Իրավացի է Վ. Ռ. Նազարյանը, երբ գրում է, թե խնդրո առարկա ժամանակաշրջանում «պետք էր ամենից առաջ գործով հաստատել և ամրապնդել սովետական պետականությունը հանրապետությունում, ավելի ուշ թողնելով իրավաբանական ձևակերպումների կատարելագործումը»²²:

Ալեքսանդր Բեկզադյանի՝ երևան ժամանելուց և արտաքին գործերի ժողկոմի գործառույթները ստանձնելուց հետո Սովսես Պետրոսյանը, ինչպես երևում է արխիվային վավերագրերից, սկզբնական շրջանում իրականացնում էր ժողկոմի տեղակալի կամ, ինչպես այն շրջանում էին կոչում, օգնականի գործառույթները: 1920 թ. դեկտեմբերի 10-ին և 28-ին պատրաստված երկու փաստաթղթերում նա հիշատակվում է իբրև «նախարարի օգնական»²³: Այս առումով ճիշտ չէ պատմաիրավագիտական գրականության մեջ տեղ գտած այն ձևակերպումը, թե արտաքին գործերի ժողկոմը «տեղակալ կամ օգնական չունեի»²⁴: Այլ խնդիր է, որ Մ. Պետրոսյանի՝ արևելյան բաժնի վարիչ նշանակվելուց հետո ժողկոմի օգնականի հաստիքը վերացվեց:

Նշանակվելով խորհրդային Հայաստանի արտաքին գործերի ժողովրդական կոմիտեի՝ Ալ. Բեկզադյանը ժառանգեց Հայաստանի Հանրապետության արտաքին գործերի նախարարության կառուցվածքը և անձնակազմը: Անձնակազմի անդամներից շատերը կարևոր դերակատարություն էին ունեցել ՀՀ արտգործնախարարության աշխատանքների կազմակերպման գործում և փորձառություն ձեռք բերել, ինչը օգտակար կարող էր լինել նորաստեղծ արտգործողկոմատի համար: Կարծում ենք, այս առումով սուբյեկտիվ է Ա. Ա. Եսայանը, երբ գրում է, թե «Արտգործողկոմատը գործի անցավ ձևավորված

²⁰ Տե՛ս նույն տեղը, գ. 30, թ. 2:

²¹ Տե՛ս նույն տեղը, գ. 192, թ. 1-21:

²² Նազարյան Վ. Ռ., նշվ. աշխ., էջ 61:

²³ Տե՛ս ՀԱԱ, ֆ. 114, ց. 1, գ. 11, թ. 15, գ. 30, թ. 2:

²⁴ Եսայան Ա. Ա., նշվ. աշխ., էջ 363:

ապարատի լիակատար բացակայության ... պայմաններում»²⁵: Մինչդեռ իրականությունն այն է, որ արտգործժողկոմատում սկզբնական շրջանում պահպանվել են նախկին արտգործնախարարության մի շարք բաժինների անվանումները, իսկ աշխատակիցներից շատերին վստահվել են պատասխանատու պաշտոններ: Այսպես, արտգործժողկոմատի պաշտոնյաների մեզ հայտնի առաջին ցուցակը թեև անթվակիր է, բայց դատելով բովանդակությունից՝ այն կազմվել է 1920 թ. դեկտեմբերին: Ամենայն հավանականությամբ, ցուցակը պատրաստվել է դեկտեմբերի 10-ին արտաքին գործերի ժողկոմատին ուղղված Հայիեղկոմի այն շրջաբերականի համաձայն, որով պահանջվել էր նույն օրը ևեթ ուղարկել կոմիսարիատի աշխատակիցների ցուցակը: «Ցուցակ Արտաքին գործերի ժողովրդական կոմիսարիատի պաշտոնեաների» վերնագրված փաստաթղթում²⁶ բացակայում է արտգործժողկոմ Ալ. Բեկզադյանի անունը. ցուցակը գլխավորում է «նախարարի օգնական» Մ. Պետրոսյանը: Այստեղից հետևում է, որ այդ փաստաթուղթը կազմվել է դեկտեմբերի 10-ին, երբ Հայիեղկոմը փաստացի լուծել էր արտգործժողկոմատի ստեղծման խնդիրը, սակայն Ալ. Բեկզադյանը դեռևս ամբողջովին չէր ստանձնել ժողկոմի գործառույթները: Խնդրո առարկա ցուցակում Մովսես Պետրոսյանին հաջորդում են ընդհանուր քարտուղար Ալեքսանդր Տեր-Հակոբյանը, քաղաքական բաժնի վարիչ Պողոս Յակուբյանը, արտասահմանյան հաստատությունների բաժնի վարիչ Միհրան Խոջամիրյանը, տեղեկատու բաժնի վարիչ Մուշեղ Արզումանյանը, գաղութային բաժնի վարիչ Ներսես Բաբայանը, դիվանապետ Վահան Սարայեյանը, գլխավոր հաշվապահ Տաճատ Խաչվանքյանը և այլք: Բացի գաղութային բաժնի վարիչ Ն. Բաբայանից (բաժինը ստեղծվել էր ՀՀ կառավարության 1920 թ. օգոստոսի 27-ի որոշմամբ)՝ վերը հիշատակված անձանց նույն պաշտոնները վարելիս տեսնում ենք նաև Համազասպ Օհանջանյանի ՀՀ վարչապետ և արտգործնախարար լինելու (1920 թ. մայիս-նոյեմբեր) շրջանում²⁷:

1921 թ. հունվարի 5-ի դրությամբ ժողկոմատն ուներ 17 աշխատակից: Որոշ պաշտոնյաների գործառույթները փոփոխվել էին, ստորաբաժանումները անվանափոխվել՝ օրինակ՝ Մ. Պետրոսյանն արևելյան բաժնի վարիչ էր, արտասահմանյան հաստատությունների բաժինը վերակազմավորվել էր հյուպատոսական բաժնի, որի վարիչի պաշտոնում շարունակում էր մնալ Մ. Խոջամիրյանը, նախկինում դիվանապետ Վ. Սարայեյանն իրականացնում էր պատասխանատու գործավարի գործառույթներ²⁸:

Ամփոփելով կարող ենք փաստել, որ 1920 թ. դեկտեմբերի 3-10-ին ՀՍԽՀ արտաքին գործերի նախարարության ժամանակավոր վարիչի պարտականությունները կատարում էր Մ. Պետրոսյանը: ՀՍԽՀ արտաքին գործերի ժողկոմատը կազմավորվել, իսկ Ալ. Բեկզադյանը սկսել է ժողկոմի գործառույթներ իրականացնել 1920 թ. դեկտեմբերի 10-ին: Կազմավորմանը հաջորդած առաջին ամիսներին ժողկոմատի անձնակազմը կտրուկ փոփոխությունների չենթարկվեց. այստեղ շարունակում էին պաշտոնավարել ՀՀ արտգործնախարարության աշխատակիցները: Պարզորոշ տես-

²⁵ Նույն տեղում:

²⁶ Տե՛ս ՀԱԱ, ֆ. 114, ց. 1, գ. 11, թ. 15:

²⁷ Տե՛ս նույն տեղը, ֆ. 200, ց. 1, գ. 617, թ. 89:

²⁸ Տե՛ս նույն տեղը, ֆ. 114, ց. 1, գ. 40, թ. 5:

նում ենք, որ ինչպես այլ պետական իշխանության մարմինների, այնպես էլ արտգործողական պարագայում խորհրդային իշխանությունները (հատկապես սկզբնական շրջանում) գրեթե ամբողջությամբ պահեցին նախկինից ժառանգած կառուցվածքն ու անձնակազմը:

АМО СУКИАСЯН – Из истории формирования Народного комиссариата иностранных дел Арм. ССР. – 2 декабря 1920 г. в Армении была установлена советская власть. Прибыв 4 декабря в Ереван, Армревком приступил к формированию органов власти. Сопоставляя архивные документы и сообщения прессы того времени, автор показывает, что Народный комиссариат иностранных дел Советской социалистической республики Армения фактически был сформирован 10 декабря 1920 г. В статье также освещается деятельность заведующего Министерством иностранных дел ССРА М. Петросяна со дня советизации до 10 декабря. Поясняется, что после формирования наркомата бывшие сотрудники Министерства иностранных дел РА продолжили свою деятельность в советском Наркоминделе.

НАМО СУКИАСЯН – From the history of the formation of People's Commissariat of Foreign Affairs of Arm SSR. – On December 2, 1920, Soviet power was established in Armenia. On December 4, having arrived in Yerevan, Armrevcom started to assign local authorities. Against the analysis of archive materials and press releases of that period, the author demonstrates that People's Commissariat of Foreign Affairs of ArmSSR was actually formed on December 10, 1920.

The paper also dwells on the activities of the Head of the Ministry of Foreign Affairs of ArmSSR М. Petrosyan (from December 2 to December 10). It appears that after the establishment of People's commissariat, the former officials of the Ministry of Foreign Affairs of the first Republic of Armenia joined the People's Commissariat of Foreign Affairs.